

■ TRIBUNA POLITICA

Grazia fitg a las vischnancas!

DA CHRISTIAN RATHGEB,
CUSSEGLIER GUVERNATIV

Dacurt ha gì lieu en l'Arena a Cazas la quarta dieta da vischnancas. Questa occurrenza d'infurmaziun che vegn mintgamai organisada e realisada da l'uffizi da vischnancas è stada in success cumplain! Pertge? Per mai è la dieta stada ina manifestaziun impressiu-nanta dal federalissem grischun e l'expressiun da la relaziun collegiala tranter las vischnancas ed il chantun. 230 represchentantas e represchentants da las vischnancas èn sa scuntrads ad in barat multifar d'infurmaziuns e d'ideas. Il grond dumber da participantas e participants ed il fatg che mo poucas vischnancas han stuì la-schar stgisar lur absenza suttastritga il basegn d'ina tal'occurrenza.

Davart da mes departament è la dieta stada l'ocasiun per orientar davart dumondas actualas e davart svilups futurs che pertutgan il chantun e las vischnancas. Temas hai gì avunda! Uschia hai jau pudì tematisar la sessiun d'avust dal cussegl grond e menziunar la realisaziun dal project fiscal (refurma fiscal e finanziaziun da la AVS, RFFA), exprimer mes confess per la cunti-



nuitad strategica da la refurma da las vischnancas grischunas, infurmar davart ils svilups en la gulivaziun da finanzas naziunala e chantunala sco er orientar davart il stadi e davart l'ulteriur proceder per segirar a lunga vista l'equiliber da las finanzas (project GrFlex).

Las incumbensas e las sfidas da las vischnancas èn multifaras. Spezialmain pertutgadas èn las vischnancas per il mument en connex cun la realisaziun da la lescha davart l'egualitad da personas cun impediments. Davart quest tema ha referì mes collega da la regenza *Mario Cavigelli*. Per ch'ellas possian ademplir lur incumbensas vul la regenza sustegnair las vischnancas cun dapli meds finanziais chantunals. En ina missiva al cussegl grond dumonda la regenza in credit d'impegn general da 25 mil-

liuns francs per il subvenziunament previs da las adattaziuns architectonicas da las fermadas da bus.

Er en il sector da la pro-tecziun da la populaziun han las vischnancas prestà bler ils ultims onns. Igl è bun da savair ch'ìls stabs directivs communal funcziunan propi en la pratica ed èn abels da dumagnar eveniments extraordinaris. Che las sfidas da la digitalisaziun vegnan ad occupar nus tuts pli baud che tard na vegn strusch pli dubità. Davart tut quests temas èsi vegnì referì e discutà...

L'aut grad da federalissem e d'autonomia en il Grischun n'è betg mo flosclas vidas, mabain realitad vivida. En mes egl èsi dentant impurtant ch'in viv barat d'experientschas tranter las vischnancas vegnia tgirà pli e pli activamain. La dieta da vischnancas ch'ha lieu mintga dus onns è in'ocasiun excellenta en quest regard e vegn acceptada cun engraziament. L'onn proxim ma scuntr jau cun ils presidis communal en il rom da conferenzas regiunalas da las presidentas e dals presidents. Fermas vischnancas – in ferm chantun: Nossa incarica, nossa obligaziun!